

Sakspapir

Sakshandsamar	Arkiv	ArkivsakID
Sigvald Kvinge	FA - M74	16/992

Saknr	Utval	Type	Dato
119/2017	Formannskapet	PS	28.11.2017
072/2017	Kommunestyret	PS	28.11.2017

Invitasjon til etablering av Vest brann- og redningsregion

Vedlegg:

Journalposttittel	Dato
VEDLEGG 1 Rapporten Brannsam arbeid i bergensregionen	10.11.2017
VEDLEGG 2 Vedtekter april 2017	10.11.2017
VEDLEGG 3 Mottatt høringsinnspill til rapport	10.11.2017
VEDLEGG 4 Innspill til rapport med kommentarer	10.11.2017

Rådmannen sitt framlegg til vedtak:

1. Masfjorden kommune vedtek å avslå invitasjonen om å delta i etablering av Vest brann- og redningsregion. Økonomiske og geografiske forhold samt at dette er nybrottsarbeid med usikkerheit på utfallet, vert det ikkje vurdert som at deltaking i dette prosjektet gjev naudsynt gevinst for Masfjorden kommune.
2. Masfjorden kommune vedtek å oppretthalde/gjere ny avtale om å behalde tenesta interkommunalt utval mot akutt forureining (IUA) og 110- Hordaland.

Saksopplysningar:

Bakgrunn

Masfjorden kommune fekk i brev datert 12. mai 2017 invitasjon til å delta i etablering av Vest brann- og redningsregion. Dette er tenkt som eit interkommunalt samarbeid mellom sjølvstendige brannvesen i regionen. Frist for svar er sett ut oktober 2017.

Med bakgrunn i utfordringar frå ei risikokartlegging for kommunane i Bergensalliansen vart det gjennomført ein studie (sjå vedlegg: *Brannsam arbeid i Bergensregionen*) i samarbeid med alle kommunane i Hordaland og Gulen. Rapporten var ferdigstillt november 2016. Rapporten tilrår at det vert skipa eit samarbeid mellom sjølvstendige brann og redningstenester frå kommunane.

Fakta

Vest brann og redningsregion (VBR) skal være eit interkommunalt samarbeid etter

vertskommunemodellen med eit sekretariat, og felles styre for kommunane og vil bestå av tenestene:

1. Fagleg samarbeid for brannførebyggjande arbeid
2. Fagleg samarbeid om brann- og redningsberedskap
3. Naudmeldeteneste (110 – sentral i Hordaland)
4. Interkommunalt utval mot akutt forureining (IUA – Bergen region)

Bergensalliansen har skildra desse 4 punkta slik:

1. Fagleg samarbeid for brannførebyggjande arbeid

Å førebygge brannar og ulukker er den viktigaste oppgåva til alle brannvesen. Den nye forskrifta om brannførebygging stiller krav om eit meir målretta og allsidig brannførebyggjande arbeid. Til forskjell frå tidlegare, må kommunane no ta eit større ansvar for å gjennomføre risikovurderingar, fastsette satsingsområde basert på risiko og gjennomføre tiltak i samsvar med dei etablerte planane.

Tilsyn er framleis eit viktig verkemiddel, men det skal ha ei risikobasert tilnærming.

Forskrifta gir også kommunane høve til å gjennomføre andre brannførebyggjande aktivitetar med utgangspunkt i lokalt risikobilete. Det føreset at kommunane etablerer ein systematikk som gjer det mogleg å evaluere eige førebyggjande arbeid. Føremålet med dette er å lære og å sikre kontinuerleg betring.

2. Fagleg samarbeid om brann- og redningsberedskap

Å dimensjonere brann- og redningsberedskapen og den operative handteringsevna er vanskeleg. I tillegg vil delar av denne beredskapen vere retta mot hendingar som sjeldan skjer. Difor er det viktig for regionen at kommunane samarbeider om disse oppgåvene. I dette ligg det ei erkjening av at ikkje alle kan oppretthalde kompetansen for alle typar hendingar, og at spesialistmiljøa utviklar seg best vidare gjennom praktisk erfaring. Beredskapsløysingar på tvers av kommunegrenser vil i slike tilfelle vere svært føremålstenlege.

Det viktigaste motivet for å etablere ein oversiktleg og systematisk beredskapsstruktur som omfattar fleire kommunar, er trongen for å gjere kvart einskild innsatslag best mogeleg i stand til å løyse oppgåvene dei er dimensjonerte for å kunne handtere. Samvirket mellom lokale kapasitetar og sentrale eller regionale spesialgrupper skal sikre optimal slagkraft allereie ved førsteinnsatsen, samstundes som tilgangen til støtte- og forsterkningsressursar blir føreslege. På same måte vil felles system for prosedyrar, kompetanseutvikling, øvingar, innkjøp o.l. gi ei standardisert fagleg utvikling i alle dei involverte kommunane.

3. Naudmeldeteneste (110 – sentral i Hordaland)

110-sentralen i Hordaland omfattar i dag 28 kommunar i Hordaland og to kommunar i Sogn og Fjordane. Sentralen mottar meldingar om brannar, ulykker og akutt forureining og sørgjer for effektiv varsling av næraste brann- og redningsressurs. Operatørane ved 110-sentralen har også ei viktig oppgåve med å støtte lokal brannsjef / innsatsleder når hendingar skal handterast.

Å være tilknytt ein 110-sentral er ei lovfesta plikt. Dersom ein eller fleire kommunar ikkje ønskjer å være en del av det totale samarbeidet, vil Vest brann- og redningsregion ivareta dette vilkåret gjennom å selje denne tenesta til aktuelle kommunar.

4. Interkommunalt utval mot akutt forureining (IUA – Bergen region)

IUA Bergen region består i dag av 23 kommunar i Hordaland og tre kommunar i Sogn og Fjordane. Utvalet har som oppgåve å etablere system og beredskap for å kunne aksjonere ved akutte forureiningar som anten gjeld fleire kommunar eller har eit omfang utover det den enkelte kommune er dimensjonert for å kunne handtere.

Den statlege forureiningsstyremakta har pålagt kommunane i landet om å samarbeide om beredskap mot akutt forureining gjennom IUA-strukturen. Dersom ein eller fleire kommunar ikkje ønskjer å være en del av det totale samarbeidet, vil Vest brann- og redningsregion ivareta dette vilkåret gjennom sal av beredskapen til aktuelle kommunar.

Det vert vist til aktuelle lover for etablering av samarbeidet og innhald:

- Brann og eksplosjonsvernlova § 15 f.l. – Kommunane skal samarbeida om lokale og regionale løysingar av førebyggjande og beredskapsmessige oppgåver med sikte på best mogeleg utnytting av samla resursar.
- Brann og eksplosjonsvernlova § 16 – Kommunen plikter å knytte seg til naudalarmeringssentral i region og bære kostnader knytt til etablering og drift.
- Forureiningslova § 42 og 43 – Kommuner skal sørge for naudsynt beredskap mot mindre tilfeller av akutt forureining. Vidare krav om samarbeid med andre kommunar mot akutt forureining og om interkommunale beredkapsplaner.

Masfjorden kommune er i dag tilslutta 110 – Bergen og medlem i IUA – Bergen region i forhold til beredskap mot akutt forureining.

VBR tilbyr eit regionalt samarbeid innanfor førebyggjande og beredskapsmessige oppgåver og det vert i saksutgreiinga lista opp element som:

- Samla fagmiljø
- Formelle strukturerte nettverk for å dele kunnskap
- Forutsigbar tilgang til støtte- og forsterkningsressurser
- Standardisert fagleg utvikling ved felles system for, m.a. kvalitetsstandarder, prosedyrer, øvingar, innkjøp
- Samordna beredkapsplan

Til å utarbeide eit felles grunnlag for avgjerd, som skal sendast til dei enkelte kommunane for politisk handsaming, sette Bergensalliansen i 2016 ned eit prosjekt. Dette prosjektet skulle arbeide fram eit forslag til korleis brann- og redningstenesta kunne organiserast gjennom eit samarbeid mellom sjølvstendige brannvesen i regionen.

Alliansen spurde Bergen kommune, ved Bergen brannvesen, om å vere kommunen som kunne gjennomføre prosjektet. Det blei utarbeidd ei skildring av prosjektet og gitt eit mandat for arbeidet.

Rapporten med tilrådingar blei overlevert Bergensalliansen oktober 2016. Rapporten blei drøfta i møte i januar 2017. Her vart det tilrådd å sende rapport til politisk handsaming i kvar av kommunane.

Regjeringa har gitt prosjektet og etableringa av samarbeidet status som nasjonal pilot.

Vest brann- og redningsregion

Basert på dei formelle føringane og faglege rammene som vert stilte til brann- og redningstenesta, naudmeldingstenesta og den akutte beredskapen mot forureiningar, tilrådingar frå rapportar og utgreiingar, samt faglege vurderingar gjort av egne

arbeidsgrupper, fremjer Bergensalliansen forslag til ein heilskapleg samarbeidsmodell for dei sjølvstendige brann- og redningstenestene i bergensregionen gjennom etablering av Vest brann og redningsregion.

Vest brann- og redningsregion skal ikkje være arbeidsgjevar, men skal basere den faglege utviklinga på personell tilknytt det enkelte brannvesen.

Organisering

Det enkelte kommunestyre

Det enkelte kommunestyre fattar avgjerd om å melde seg inn og ut av brannsamrådet. På same måte godkjenner det øvste avgjerdsorganet i kommunen vedtektene for eit slikt samarbeid. I tråd med vedtektene, skal også kommunestyret utnemne representantar til årsmøtet i samarbeidet.

Årsmøtet

Årsmøtet – samansett av representantar frå kommunestyra i deltakarkommunane – er det øvste avgjerdsorganet i samarbeidet og skal sjå til interessene til deltakarkommunane, setje saman styret og velje styreleiar.

Styret

Styret – samansett av rådmenn, kommunalsjefar e.l. – skal sjå til at Vest brann- og redningsregion er i stand til å løyse oppgåvene etter føremålet i vedtektene gjennom å ha eit overordna ansvar for planlegging, gjennomføring og rapportering.

Administrasjonskommune

Bergen kommune er foreslått som administrasjonskommune. Administrasjonskommunen skal stå for dagleg leiding og drift av Vest brann- og redningsregion og stille kontorfasilitetar til disposisjon for sekretariatet.

Leiar for Vest brann- og redningsregion

Brannsjefen i administrasjonskommunen er foreslått som leiar for Vest brann- og redningsregion. Leiar rapporterer til styret, har ansvar for sekretariatet og at aktiviteten utviklast i tråd med lovverk, vedtekter og fastsette rutinar. Vidare har leiar budsjett- og resultatansvar for den totale aktiviteten i samarbeidet.

Fagutval

Fagutvala – brannsjefar og/eller avdelingsleiarar i brann- og redningstenesta – er det faglege kontaktorganet for leiaren og skal vere med på å koordinere det faglege arbeidet i regionen. Fagutvala skal også kunne bidra med å greie ut og førebu saker som skal handsamast av styret.

Sekretariatet

Sekretariatet skal yte administrativ støtte til samarbeidet, samt koordinere faglege nettverk og arenaer for kunnskapsdeling. Sekretariatet skal også være møtesekretær for årsmøtet og styret, handsame og førebu saker til desse organa.

Økonomiske konsekvensar

Vest brann- og redningsregion skal ikkje erstatte dagens lokale brann- og redningsteneste, men vere eit samarbeid mellom sjølvstendige brannvesen. Forslaget inneber difor ikkje overdraging av verksemd. Vest brann- og redningsregion er vidare ikkje eit eige rettssubjekt.

Vest brann- og redningsregion vert foreslått oppretta i medhald av følgjande lover:

- Lov av 25. september 1992 om kommuner og fylkeskommuner (kommuneloven) § 27,
- Lov av 14. juni 2002 om vern mot brann, eksplosjon og ulykker med farlig stoff og om brannvesenets redningsoppgaver (brann- og eksplosjonsvernloven) §§ 15 og 16
- Lov av 13. mars 1981 om forurensninger og om avfall (forurensningsloven) §§ 43 og 44

Rapporten tilrår at brannsam arbeidet finansierast av deltakarkommunane etter desse prinsippa:

1. Eit grunntilskot som skal vere ein viss del av det samla budsjett for kommande driftsåret.
 1. I tillegg til grunntilskotet skal deltakarkommunane betale eit tilskot per innbyggjar som samla skal utgjere den resterande delen av samla budsjett for kommande driftsåret.
 2. Budsjett for kommande driftsåret vert fastsett av årsmøtet med omsyn til aktiviteten som vert vedtatt for driftsåret.

Totalt representerer brannsam arbeidet ein meirkostnad på om lag fem millionar kroner, der 80 % er øyremerka til utvikling av spesialtenester for regionen, materiell og fellessystem. Dei resterande 20 % vil i hovudsak bli nytta til koordinering av fagmiljø og uthenting av synergjar mellom desse.

Vedtekter

Vedtektene frå rapporten, er etter mottatt høyringsinnspel til Bergensalliansen, blitt justerte etter møte den 27. januar 2017. Følgjande er endra etter det opphavlge forslaget frå rapporten:

- For § 7 Årsmøtet

Dei to første setningane i siste avsnitt er byta ut med følgjande:

«Én representant fra hver arbeidstakerorganisasjon tilknyttet brann- og redningstjenesten har møte- og talerett uten forslagsrett på årsmøtene. Ved lukkede møter skal arbeidstakerorganisasjonenes møte- og talerett vurderes særskilt»

- For § 9 Styret

Første setning i tredje avsnitt er byta ut med følgjande:

«Årsmøtet velger styremedlemmene og deres vararepresentanter blant rådmenn, kommunaldirektører, kommunalsjefer eller andre på tilsvarende nivå i deltakerkommunene.»

- For § 9 Styret – styrets oppgaver, pkt. c.

Ny tekst som erstatter pkt. c under styrets oppgaver

«Påse at det til enhver tid foreligger et felles overordnet plandokument som bygger bro mellom brannordningene i kommunene, samt fordele spesialfunksjoner og –oppgaver»

- For § 9 Styret

Dei to første setningane i siste avsnitt er byta ut med følgjande:

Én representant fra hver arbeidstakerorganisasjon tilknyttet brann- og redningstjenesten har møte- og talerett uten forslagsrett på styremøtene. Ved lukkede møter skal arbeidstakerorganisasjonenes møte- og talerett vurderes særskilt»

- For § 13 Fagutvalg

Nytt avsnitt lagt til

«Fagutvalgenes medlemmer skal velges blant brannsjefer og avdelingsledere frå brann- og redningstjenestene i deltakarkommunane.»

Forslag til oppdaterte vedtekter for samarbeidet følgjer som vedlegg 1.

Prosess

Bergensalliansen forstår at det å etablere Vest brann- og redningsregion er krevjande fordi ulike kulturar og system skal samkøyrast. Ei trinnvis utvikling, basert på god involvering av tilsette og fagmiljø, er difor avgjerande for å lukkast.

Tilrådinga er basert på ein omfattande dokumentasjon som går fram av rapporten «En tryggere hverdag». Denne er utarbeidd av eit samla fagmiljø i regionen og vert lagt til grunn for den trinnvise utviklinga som er tilrådd. Rapporten følgjer som vedlegg 2.

Arbeidet med rapporten og grunnlaget for tilrådinga frå Bergensalliansen har vore leia av ei styringsgruppe samansett av Terje Søviknes – ordførar i Os kommune, Harald Schjelderup – byrådsleiar i Bergen kommune, Kari-Anne Landro – ordførar i Sund kommune, Hans-Erik Ringkjøb – ordførar i Voss kommune og Øyvind H. Oddekalv – ordførar i Meland kommune. Innstillinga frå styringsgruppa har vore på høyring. Det er gjennomført to innspelsmøte, eitt med rådmennene i regionen og eitt med fagforeiningane som organiserer dei tilsette i brannog redningstenesta.

Bergensalliansen mottok følgjande skriftlege innspel:

- Mindretalsmerknad frå Fagforbundet, 16. september 2016
- Innspel frå Fylkesmannen i Hordaland, 3. januar 2017
- Innspel frå Regionrådet i Nordhordland til møtet 11. januar 2017
- Innspel frå NITO, 17. januar 2017
- Innspel frå Statens strålevern, 24. januar 2017
- Innspel frå Fagforbundet, 20. januar 2017
- Innspel frå Kystverket, 20. januar 2017
- Innspel frå Direktoratet for samfunnssikkerhet og beredskap, 26. januar 2017

Høyringsinnspela med merknadar til rapporten er lagt ved som vedlegg 3. Kommentrar frå sekretariatet til Bergensalliansen til høyringsinnspela som er mottatt er lagt ved som vedlegg 4.

Frå møtet med rådmennene i deltakarkommunane vart det sett ned ei eiga rådmannsgruppe som skulle kome med innspel til saksframlegget. Gruppa har mellom anna diskutert trongen for ein samarbeidsavtale, i tillegg til vedtektene, som skulle følgje saksframlegget.

Gruppa vart delt i i synet på om dette skulle utarbeidast. Styringsgruppa for brannsam arbeidet til Bergensalliansen har difor vald å ikkje utarbeide ein eigen samarbeidsavtale. Difor vert det foreslått å vurdere etter eitt års drift om det er trong for ytterlegare detaljering av samarbeidet gjennom ein samarbeidsavtale.

For å sikre at dei økonomiske konsekvensane for samarbeidet er føreseielege, har rådmannsgruppa også gitt tilslutnad til at det kan setjast inn eit forslag til felles vedtakspunkt som avgjer budsjettet dei første tre åra. Forslaget seier at det i det førsteåret vert lagt til grunn at budsjettet skal vere på fem millionar kroner, og at dei neste to driftsåra berre justerast for løns- og prisvekst.

Forslag til vedtak i den enkelte kommune:

Bergensalliansen foreslår følgjande felles vedtakspunkt i saksframlegget:

1. _____ kommune inngår som medlem i Vest brann- og redningsregion

2. _____ kommune sluttar seg til vedtektene for samarbeidet
3. _____ er _____ kommunes årsmøtorepresentant for gjeldande kommunevalperiode
4. _____ kommune gir Bergensalliansen fullmakt til å velje eit interimsstyre for Vest brann- og redningsregion som skal fungere inntil ordinært styre vert vald av det første ordinære årsmøtet
5. Melding om vedtak sendast sekretariatet til Bergensalliansen
6. Første driftsåret vert det lagt til grunn at budsjettet skal vere på fem millionar kroner. Dei to neste driftsåra skall budsjettet berre justerast for pris- og lønsvekst

Vurdering

Rapporten er på 140 sider og ein omfattande rapport å sette seg inn i. Etter Masfjorden kommune si vurdering er det mange ting i rapporten som ikkje er avklart. Viktige og sentrale moment som ikkje er sagt noko om i rapporten er mellom anna ansvar og mynde. Dette gjeld også det som omhandlar økonomi. Skal ein gå inn i eit samarbeid må det vere klårt definert kva områder og tiltak som VBR skal arbeide med.

I rapporten er det lista opp forslag som kan gå inn under det regionale samarbeidet. Det er blant anna sagt at ein kan gå saman for å standardisere felles system som til dømes kvalitetsstandardar, prosedyrar, øvingar og innkjøp. Dette er områder som etter kvart kan føre til ei uklår definering av ansvar og oppgåver. I dag er det brannsjefen i kvar enkelt kommune som har dette ansvaret. Det kan også bli eit økonomisk spørsmål. Dette kan på sikt ha ei økonomisk utfordring, fordi standardisering kan medføre ulik kostnad i dei ulike kommunane.

For kommunar som Masfjorden kan det være nyttig å ha tilgang til spesialkompetanse ved store og komplekse hendingar, men dette er allereie ivaretekt i lov om brannvern § 15, 3.ledd (bistandsplikt), som pålegg alle kommunar å yte bistand på anmodning ved behov. I tillegg seier statistikken at av alle innsatsar i Hordaland, er det ca 1 % der eit brannvesen bistår eit anna. Av denne prosent er det 70 % der mindre brannvesen bistår større brannvesen og 30 % der større brannvesen yter bistand til mindre. Dette betyr at det, statistisk, dei siste 10 åra har vore 3 hendelsar der me har fått bistand frå større brannvesen, Jf. Rapport med opplysningar om samarbeid i brannregion Hordaland.

Kostnader knytt til deltaking slik dei ligg føre i dag, skal berre dekke administrasjon i vertskommunen. Konkret 0,2 årsverk som regionbrannsjef og 2 årsverk til merkantile stillingar. Det er vanskeleg å forstå at dette kan gje betre beredskap i Masfjorden kommune. Kostnader knytt til tiltak som denne administrasjonen legg opp til, kjem i tillegg.

I dag betalar Masfjorden kommune kr 40 696,- for deltaking i IUA – Bergen region og kr 62 392,- for tilknytning til 110 – sentralen i Bergen. Dette er lovpålagte avtaler. Det er signalisert at medlemsavgifta til desse tenestene skal aukast monaleg for dei kommunane som vel å stå utanfor samarbeidet, utan at det er kome konkrete tal på kva det betyr. Eit viktig spørsmål er om det er lovleg å auke kostander knytt til ei lovpålagt teneste på bakgrunn av at ein ikkje inngår i dette samarbeidet.

Økonomi

Kontingent for deltaking i Vest brann og redningsregion er i rapporten, for Masfjorden kommune, sett til kr 238 000,-. Når ein trekkjer frå dagens kontingent for deltaking i IUA og alarmsentralen, vert auken på kr 121 000,-. I seg sjølv er ikkje dette så mykje pengar, men når dette skal trekkast av

ramma som ein har i dag, får det alvorlege konsekvensar. I prosjektet fordrar det til at ein skal oppretthalda eksisterande beredskap som i dag. Dette er ein kostand som kun gjev Masfjorden kommune «inngangsbilett», som skal gå til å dekke administrative kostandar. Eventuelle føringar/tiltak som vert beslutta regionalt vil mest truleg komme i tillegg. Når det gjeld kostnad til deltaking i Vest brann og redningsregion så gjev fordelingsnøkkelen ein større kostnad for dei små kommunane, enn dei store kommunane i samarbeidet.

Det er heller ikkje lagt opp til at den respektive kommune kan redusera sin beredskap. Ein skal ha sin eigen grunnberedskap som før. Det er kun spesialtenester / spesialkompetanse som skal ivaretas av Vest brann og redningsregion (VBR).

Utvikling av regionale spesialistmiljøer i dei største brannvesena på bekostning av dei små.

Rapporten seier at VBR skal byggja opp spesialistkompetanse i regionen. Det vert framstilt som om ulike spesialmiljø kan byggjast opp rundt omkring i dei ulike deltakarkommunane. Dette vert då gjerne litt vanskeleg å forstå når rapporten seier på side 25, sitat: «*Regionale oppgaver vil i utgangspunktet tillegges kommuner som har forutsetninger for å løse den tildelte funksjonen. Det legges til grunn at et regionalt ansvar ikke skal medføre behov for økt bemanning hos kommunene som tildeles slike oppgaver*», sitat slutt. Dette kan gjerne tolkast til at all spesialkompetanse skal etablerast/utviklast i dei store brannvesena. Det er lite truleg at Masfjorden kommune får anledning til å vera med på denne utviklinga, men derimot betala for å etablere/utvikla kompetanse i administrasjonskommunen og andre større brannvesen med forutsetningar for dette.

Målsetting om auka kompetanse

Pilotprosjektet er gjennomført for å auka kompetansen og for å styrka beredskapen i regionen ved store, langvarige og komplekse hendingar. Dette er sjølv sagt alle samde om er viktig og nyttigt å samhandla om. Det som likevel kan vera ein risiko ved å sentralisera kompetansen til dei store sentrale kommunane, er at dette vil gje ein auke av kompetanse og ressursar i sentrale strok, medan det utarmar distrikta.

Masfjorden kommune har, saman med Gulen kommune beslutta å etablere eit øvings og kompetansesenter lokalt, mest trulen i Gulen Industrihamn. Det har vist seg undervegs i utredning- og planleggingsfasen at det er andre sentrale aktørar både regionalt og nasjonalt som synes dette var ein god ide og har signalisert at dei gjerne ynskjer å samvirka med oss på dette senteret. Området ligg sentralt til i det nye politidistriktet i tillegg til at området allereie har fasilitetar og kvalitetar som gjer det interessant for andre enn brann og redningstenesta. Senteret vil bidra til at ein lettare kan bygga og vedlikehalda kompetanse for våre eigne mannskap, noko som er avgjerande for å rekrutera og behalda deltidsmannskap i distriktet. Ny utdanning for deltidbrannvesen er under utarbeiding med deltakelse frå Gulen og Masfjorden kommune, der teknologistøtta undervisning er sentral, noko som opnar for nye mogelegheiter for øving og opplæring.

Konklusjon

Masfjorden kommune vedtek å avslå invitasjonen om å delta i etablering av Vest brann- og redningsregion. Økonomiske og geografiske forhold samt at dette er nybrottsarbeid med usikkerheit

på utfallet, vert det ikkje vurdert som at deltaking i dette prosjektet gjev naudsynt gevinst for Masfjorden kommune.

Masfjorden kommune vedtek å oppretthalde/gjere ny avtale om å behalde tenesta interkommunalt utval mot akutt forureining (IUA) og 110- Hordaland.

Formannskapet - 119/2017

FS - behandling:

Saka vart drøfta.

Framlegg til vedtak vart samrøystes tilrådd til kommunestyret.

FS - vedtak:

1. **Masfjorden kommune vedtek å avslå invitasjonen om å delta i etablering av Vest brann- og redningsregion. Økonomiske og geografiske forhold samt at dette er nybrottsarbeid med usikkerheit på utfallet, vert det ikkje vurdert som at deltaking i dette prosjektet gjev naudsynt gevinst for Masfjorden kommune.**
2. **Masfjorden kommune vedtek å oppretthalde/gjere ny avtale om å behalde tenesta interkommunalt utval mot akutt forureining (IUA) og 110- Hordaland.**